

ҰЛТТЫҚ ҚҰНДЫЛЫҚТАР – ҚАЗАҚЫ ТӘРБИЕ НЕГІЗІ

Тұңғыш Президентіміз Елбасы Н.Ә.Назарбаев: «Біз бүгінгі бейбіт тірлігіміз үшін Қазақстан деп аталатын елдің жер бетінде барлығы үшін, тарихтың әр тұсында осы елді, осы жерді қорғаған қайсар жандардың әруағының алдында әрқашанда қарыздармыз», - деп атап көрсеткендей, алдымызда өз елінің нағыз ұлтжанды патриоттарын тәрбиелеуге бағытталған үлкен де жауапты жұмыстар тұр. Өйткені отаншылдық сезімі – ұлт рухы деңгейінің айнасы мен өлшемі. Олай болса, ғасырлар сұрпынан өткен ұлттық құндылықтарымызды оқу-тәрбие процесіне енгізу арқылы тұнып тұрған рухани қазынамызбен өскелең ұрпақты сусындату басты парызымыз болмақ.



Рухани қазынамыздың халықтың өмірінде алатын орны ерекше. Халқымыздың салт-санасын жаңғырту еліміздің ішкі және сыртқы саясатын ұлттық сипатта жүргізуді талап етеді. Ол әрі бүгінгі күннің талабынан туындап отыр. Басты мәселеміз болып отырған ұлттық идея – халқымыз тудырған моральдық нормаларды, ұлттық құндылықтарды,

бекітілген патриоттық тәжірибені ұлттық этномәдени дәстүрлер мен әдеп-ғұрыптарды тану тарихты құрметтеу арқылы жүзеге аспақ.

Алаш алыптарының бірі де бірегейі, заңғар ақын Мағжан Жұмабаев: «Жас бала – жас бір шыбық, жас күнінде қай түрде иіп тастасаң, есейгенде сол иілген күйінде қалмақ» деген екен бір кездері.

Сол қайран ақын айтпақшы, бүгінгі жас ұрпақты яғни еліміздің келешегі, жастарымызды ұлттық құндылықтарға сүйене отырып тәрбиелеу – ең өзекті мәселенің бірі. О бастан тәрбие алған бала елінің ертеңі болып қалыптасары сөзсіз. Содан болса керек, Тұңғыш Президентіміз рухани жаңғыру туралы бағдарламалық мақаласында: «Ұлттық

салт-дәстүріміз, тіліміз бен музыкамыз, әдебиетіміз, жөн-жоралғыларымыз, бір сөзбен айтқанда, ұлттық рухымыз бойымызда мәңгі қалуы тиіс», - деп көрегендікпен ой түйіндейді.

Айтылған мәселеге бүгінгі күннің тұрғысынан қарар болсақ, егемен еліміздің бейбітшілігі мен бірлігін, ынтымағын сақтайтын жас ұрпақтың бойына ерлік рухты, отаншылдық сезімді сіңіру ең маңызды мәселеміздің бірі десек болады.

Ұлтжандылық, отансүйгіштік рух – егемен еліміздің әлемдік өркениет көшіне қосылып, жер жаһандық қауымдастықтан өзіндік орнын алуға мүмкіндік беретін бірден-бір факті. Сондықтан да ол баршамызға ортақ мәселеге жатады.

Ш.СЕМБИЕВА,
М.Әуезов атындағы
ОҚУ-дың аға
оқытушысы.